




*Senin, 07 Desember 2020*  
**JEREMIA 40:13-16**



**Kurang Metenget**



**M**egati si begi istilah, *musuh dalam selimut* si akap teman kepeken lit ukurna meneken kita. I bas pemerintah Gubernur Gedalya, rakyat Juda, mulai nggeluh aman, damai ras sejahtera. Lit ka pe sekelompok kalak Jahudi eme Ismael anak Netania, Johanan anak Kareah, Seraya anak tan humet, kerina anak Epai i Netopa nari, ras Jesania i Maaka nari ras anak buahna reh ku Mispa ndahi Gedalya. Meriah ukur Gedalya ngalo-ngalosa janah isuruhna pe gelah kerina ngendesken diri man kerajaan Babel. Tapi alu sinik-sinik, sekalak i bas kalak enda ndai ngukurken Gedalya, isusunna strategi lako munuhsa. Ismael, sekalak anak keturunan kerajan, atena tetap mbela kerajan Israel si enggo iruntuhkan Nebukadneser. Nembeh kal atena tentara-tentara Babel si enggo munuh raja Zedekia ras anak-anakna. Gara kal pusuhna ngenehen kalak Babel, emaka ngenehen Gedalya pe nembeh kal atena iakapana Gedalya e pe pro-Babel. Cemburu ia man Gedalya e erkiteken ia iangkat jadi gubernur si labo keturunan kerajan, sura-surana min ndai ia jadi gubernur e. La teraloken Ismael bangsana enggo talu, lalap iasuhina dendam. Dendam enda reh dekahna reh belinna, lanai terolangi ise pe, munuh naring ngenca akapna maka enggo terbalas atena nembeh. Sura-sura Ismael enda isampati raja Amon, emaka lit kal akapna gegehna lako munuh Gedalya. Situhuna sura-sura Ismael e tereteh man Johanan ras panglima tentara si lenga italuken tentara Babel. Emaka reh ia ku Mispa njumpai Gedalya, iturikenna kerna sura-sura Ismael e. Tapi la tek Gedalya. Teridah maka Gedalya la metenget nandangi berita si ipeseh panglimana man bana. Labo isulu-suluina kebenaren berita e. Enggo pe itawarken Johanan lako munuh Ismael alu sinik-sinik, la iuekenna. Situhuna Johanan atena engkelengi bangsa Juda si enggo tading ikutana kerina alu dame i bas pimpinen Gedalya. Ula min sempat bangsa enda pagi marpar ulihi erkiteken pemimpinna enggo mate, ras bangsa e pagi ipimpin kalak si la ertanggung jawab. Nina Gedalya, “si ikatakenndu kerna Ismael guak kap e!” Megati kal si bagenda jadi i bas kegeluhenta, kalak si akap teman e banci jadi imbangta, dungna kita jine ibenekenna.

 *Perlu kal si sipati biak teman teman si i`sekelewetta*